

**■ GLOSSA**

# Det tschuf!

DA SILVIO CAMENISCH

Sontg Ottmar da nossa «nati» da ballape di uschia vers las medias da famus e glorius: Jau hai mussà il det tschuf a mamez! M'emposs jau, sche mes det tschuf ha mussà davent da mai al schiri? Tschert che jau laschass ma montar vidlonder in detectur da manzegas. Na fa quai betg mal? Savais, jau giess gugent a la pausa d'enviern cun tut la detta, inclus mes dus dets tschufs – jau hai dus tschufs, vuls ti als vesair? Fatsch jau gugent per tuts mes fans.

Mes det tschuf, di il sontg, è en spetgas e speranzas da daventar il det tschuf da l'onn. Paucas giadas durmir ha in'emprima giuria, ina segunda giuria... ah, vus conuschais il procedere ord l'effeff dals Dis da litteratura (jau mez conusch er il process bunamain kafkaesc ord l'effeff – det maltgiert a mamez, so!) gia nominà il det tschuf da l'onn. Il premi Det tschuf 2012 n'è betg pli pussaivel da prender da mai, stuess capitar bler ils proxims dis u las notgs. Las notgs vgnan gea er pli curtas.

Jau muss in det tschuf a mamez, ch'in soli sulet deputà da la pcd («la parti-



da orientada a schliaziuns», di ella da sasezza) ha gi il curaschi da votar per l'introducziun dal sistem electoral dal proporz. Il «Vinci», tgi auter? El avess merità il premi Curaschi 2012. Jau di uschia: In det maltgiert, sche betg el duess retschaiver quest award stgarsira ord ils bels mauns da la surdadra. Da mes savair fissi l'emprima distincziun da curaschi ad in dals noss.

Noss professor Clà da l'uni, en l'uni e tras l'uni avess tuttavia raschuns da mussar a sasez il det tschuf ad exponents da la «Weltwoche». Clà pudess tuttavia er sa laschar provocar da mussar là a sasez in det tschuf, dus dets tschufs, trais dets tschufs. Nus avain gea anc la detta-pe, jau manegel, quella è er creschida per insatge ord noss torso pe. Per insatge

duessan nus duvvar, duessan nus nizzegiar ella, la detta-pe; autramain sa reducescha quella en, sco la sosa. Il det lung tranteren vul gea er sa far valair. Der Bursch will zeigen, wer ich bin! Quel vul mussar, tge schani ch'el è.

Duai jau mussar a mamez il det tschuf al culm chasa en l'Arena alva? La revoluziun al culm fiss, mussassan nus tuts il det tschuf a nus sezs per pretschs puspè auzads, «onn per onn vinavon» statti cun raschun en la chanzun. Nus pudessan gea «guder, flonar e sursaissar» gist uschè bain per damain raps vi Sursaissa. La revoluziun al culm fiss, sche nus na laschassan enavos (pli) naginas vanzadiras als lieus da massa. Nus laschain enavos tonnas, er tar festas da chors, da musica, da tir. Giess l'urs vinavant. Jau na manegel betg tai, Urs, betg ti es manegià.

Det tschuffira a mamez, danoravers, duess jau insacur cun ina tematica, duas tematicas, trais tematicas en mias gossas (glossas) avoir stridà u permalà sensibels. Fatsch jau gugent. Savais, jau sun er sensibel. Mes det amez è er sensibel e sa lascha provocar latiers anc detg spert.